



**KPWKM**

**TEKS UCAPAN**

**YB DATO' HAJAH SITI ZAILAH BINTI MOHD YUSOFF  
TIMBALAN MENTERI PEMBANGUNAN WANITA, KELUARGA DAN  
MASYARAKAT**

**PROGRAM**

**SEMARAK SKUAD WAJA SABAH 2022**

**LOKASI / TARIKH / MASA**

**IMAGO SHOPPING MALL, KOTA KINABALU, SABAH /  
5 JUN 2022 (AHAD)**

Bismillahir Rahmanir Rahim

Assalamualaikum Warahmatullahi Wabarakatuh,  
Salam Sejahtera, Salam Keluarga Malaysia

**(SALUTASI)**

**LAMPIRAN SALUTASI DISEDIAKAN**

(A) **PENDAHULUAN**

1. Alhamdulillah, marilah kita sama-sama memanjatkan kesyukuran ke hadrat Allah S.W.T kerana dengan limpah kurnia dan keizinan-Nya, kita semua dapat bertemu dan berkumpul dalam suasana yang penuh ceria dan meriah pada hari ini **sempena Majlis Perasmian Program Semarak Skwad Waja Sabah 2022.**
2. Sesungguhnya **kehadiran dan komitmen anda semua dalam Program Skwad Waja ini amat penting dan bermakna** dalam usaha memperkasakan wanita dan memberi kesedaran kepada seluruh masyarakat untuk **sama-sama melindungi wanita terutamanya dari sebarang bentuk keganasan.**

### **(B) LATAR BELAKANG SKUAD WAJA**

3. Para hadiran yang saya muliakan, **perlaksanaan Skuad Waja telah bermula semenjak pengumuman YAB Perdana Menteri sempena Majlis Sambutan Hari Wanita pada 8 Mac 2021 yang lalu dan Majlis Pelancaran Skuad Waja telah disempurnakan pada 17 Oktober 2021. Skuad Waja yang bermaksud Skuad Wanita Anti Jenayah merupakan program sukarelawan yang dilaksanakan bagi meningkatkan kesedaran seluruh masyarakat untuk mengambil tindakan bagi menghentikan keganasan terhadap wanita.**
4. Penubuhan Skuad Waja ini merupakan inisiatif yang amat bertepatan dengan objektif Kementerian dalam **memastikan golongan wanita dilindungi dan masyarakat cakna akan perilaku jenayah yang**

**berlaku di sekeliling mereka.** Kewujudan Skwad Waja dalam komuniti ini dilihat memberi impak yang positif terutamanya kepada mangsa yang sangat-sangat memerlukan sokongan dan bimbingan, maklumat serta sumber rujukan yang boleh membantu mereka terus kuat dan bebas dari berterusan menjadi mangsa. **Skuad Waja berperanan sebagai rujukan masyarakat** khususnya wanita dengan merujuk kes mangsa kepada pihak-pihak yang mempunyai kemahiran dan kepakaran dalam mendapatkan pertolongan profesional.

5. **Peranan Skwad Waja** juga telah **diperluaskan sebagai ejen perkhidmatan psikososial dalam komuniti** dalam usaha meningkatkan pengetahuan wanita bukan sahaja dari aspek perundangan dan hak wanita, tetapi juga melalui empat (4) aspek utama dalam pemerkasaan wanita iaitu **ekonomi, kemahiran, keseimbangan dan kepimpinan (4K).**

6. Untuk pengetahuan para hadirin sekalian, program Sukarelawan Skwad Waja ini adalah berbeza dengan program sukarelawan yang lain di mana bagi melengkapkan diri sebagai Sukarelawan Skwad Waja, ahli Skwad Waja **akan menerima latihan berstruktur menggunakan Modul Skwad Waja** yang dibangunkan oleh Jabatan Pembangunan Wanita (JPW).
7. Modul ini memberi fokus kepada penyampaian ilmu dan kemahiran asas **bimbingan dan psikologi** dalam usaha **meningkatkan keseimbangan sendiri, keluarga, komuniti setempat dan masyarakat keseluruhannya** di samping **pengetahuan mengenai literasi undang-undang**. Pembangunan Modul ini menjadi asas agar keseragaman

dalam latihan dan gerak kerja Skwad Waja itu dipimpin dan tidak tersasar dari matlamatnya.

**(B) STATISTIK KEGANASAN RUMAH TANGGA.**

8. Kes keganasan rumah tangga semakin hari semakin hebat dilaporkan di media perdana dan media sosial. Menurut Statistik PDRM sepanjang **Januari hingga April 2021** , **sebanyak 627 kes keganasan rumah tangga telah dilaporkan** dan **dari jumlah tersebut, di Sabah dilaporkan sebanyak 126 kes.** Pada tahun ini pula, **dalam tempoh yang sama iaitu Januari hingga April 2022, dilaporkan sebanyak 576 kes** iaitu terdapat sedikit penurunan, namun di **Sabah bagi tempoh yang sama iaitu Januari hingga April 2022 ialah sebanyak 145 kes.** Walaupun berlaku sedikit peningkatan di Sabah, namun kita boleh sama-sama menangani

isu dengan kerjasama padu dari semua pihak, termasuklah bila Skwad Waja memainkan peranannya dalam komuniti.

(C) **SKUAD WAJA DI SABAH**

Hadirin dan hadirat sekalian,

9. Semenjak program Skwad Waja **dilancarkan pada tahun 2021, jumlah Skwad Waja yang telah dilatih pada tahun 2021 adalah seramai 120,693 orang. Manakala dari Januari hingga 26 Mei 2022, seramai 172,003 Sukarelawan Skwad Waja telah berdaftar menjadikan keseluruhan ahli Skwad Waja adalah seramai 292,696.**



10. **Di Sabah**, kita mempunyai seramai **21,387** ahli **Skuad Waja** yang terdiri daripada **12,228** wanita dan **9,159** lelaki. **Tahniah dan syabas** saya ucapkan kepada semua yang telah menjadi **Keluarga Skuad Waja!** Ribuan terima kasih atas semangat dan pengorbanan masa, tenaga serta keringat ahli Skuad Waja semua dalam memastikan kelancaran agenda pemerksaan wanita dapat dilaksanakan.
  
11. Hasil daripada perlaksanaan Skuad Waja ini, **seramai 45,605 orang telah berjaya di santuni oleh ahli Skuad Waja** semasa program psikososial. Pelbagai **program psikososial** telah dilaksanakan oleh Skuad Waja Sabah bersama-sama dengan Pejabat Pembangunan Wanita Wilayah Persekutuan antaranya adalah:
  - i) Program Psikososial Kembara Skuad Waja Kota Belud

- ii) Kembara Skwad Waja Daerah Sandakan
- iii) Program Psikososial Kembara Skwad Waja Tuaran
- iv) Program Psikososial Kembara Skwad Waja Ranau
- v) Program Psikososial Kembara Skwad Waja Beluran, dan
- vi) Program Psikososial Kembara Skwad Waja Pulau Tetabuan.

12. Selain itu, pihak Jabatan Pembangunan Wanita (JPW) dan Skwad Waja Sabah juga telah membuat beberapa **kunjung hormat bagi memberi penerangan berkaitan Skwad Waja, objektif penubuhan Skwad Waja, serta aktiviti yang dilaksanakan dengan komitmen pemimpin wanita tertinggi Sabah** dalam melancarkan pelaksanaan program Skwad Waja. Antaranya ialah Kunjung Hormat kepada YABhg. Datin Seri Panglima Hajah Juliah Salag, isteri kepada YAB Ketua Menteri Sabah dan Kunjung

Hormat kepada Toh Puan Datuk Seri Panglima (Dr) Hajah Norlida binti Tan Sri Datuk R.M Jasni, isteri kepada TYT Sabah.

13. Dengan penglibatan secara aktif dan penganjuran program yang pelbagai, **saya percaya dan yakin Skwad Waja Sabah akan bergerak dengan lebih cemerlang dan dapat mengesan serta membantu lebih ramai wanita rentan dalam komuniti.**
  
14. Para hadirin yang dikasihi sekalian, berdasarkan **Laporan Bajet Tahun 2022, Kementerian Kewangan** telah **memberi sedikit peruntukan** bagi tujuan pemeraksanaan Skwad Waja dalam komuniti sepanjang tahun 2022. Untuk tujuan ini, **Kementerian telah memperuntukkan sebanyak RM175,000 bagi 25 daerah yang terdapat di Sabah** dalam memastikan keberkesanan dan kelancaran program Skwad Waja ini.

15. Kementerian berharap dengan jumlah peruntukan ini ahli Skwad Waja Sabah akan lebih giat dan bersemangat waja dalam menjalankan aktiviti psikososial dan menyantuni komuniti supaya peruntukan yang diamanahkan ini dapat digunakan dengan sebaiknya.

**(E) Penutup**

Puan-Puan dan Tuan-Tuan yang budiman,

16. Pelaksanaan Program Skwad Waja ini membuktikan kewujudan **sinergi yang baik di antara pihak kerajaan dengan komuniti** dalam menangani isu keganasan terhadap wanita. Ia juga merupakan amanah dan tanggungjawab yang perlu dikongsi oleh seluruh ahli masyarakat. Justeru,

semua inisiatif dan program yang dilaksanakan oleh Kementerian dan Jabatan Pembangunan Wanita patut digiatkan lagi dan disambut baik oleh masyarakat terutamanya untuk membantu mangsa keganasan.

17. Sekalung penghargaan kepada kerajaan Negeri Sabah dan agensi serta rakan strategik di Sabah seperti **Kementerian Pembangunan Masyarakat dan Kesejahteraan Rakyat Negeri Sabah (KPMKR), Jabatan Hal Ehwal Wanita (JHEWA), Majlis Penasihat Wanita Sabah, Pertubuhan Paradigma Wanita Sabah (AWAS) dan PAPISMA** serta **semua yang telah menjalinkan** kerjasama yang erat bersama Kementerian Pembangunan Wanita, Keluarga dan Masyarakat.
18. Saya berharap ahli Skwad Waja Sabah akan terus **komited dan proaktif dalam memainkan peranan untuk membantu komuniti**. Saya juga

menyeru dan menggesa orang ramai dan masyarakat Sabah di luar sana untuk menyertai Skwad Waja kerana kita semua mahukan yang terbaik untuk Keluarga Malaysia kita.

19. Sebelum saya mengakhiri ucapan saya ini, **sekalung budi kepada semua ahli Skwad Waja Sabah** kerana turut bersama-sama berganding bahu dengan Kementerian dalam agenda pemerkasaan wanita. Segala tindakan dan peranan yang telah dijalankan oleh ahli Skwad Waja merupakan sesuatu yang sangat bermakna kepada mereka yang memerlukan.
20. Ingatlah bahawa di saat kita melakukan sesuatu untuk orang lain, manusia yang paling bahagia bukanlah mereka yang mendapat lebih banyak, tetapi

mereka yang memberi lebih banyak. Semoga segala khidmat bakti yang telah dilaksanakan oleh Skwad Waja akan menjadi saham di akhirat ibarat sungai yang mengalir tanpa henti.

Puteri Kadazan berkain Kelingkan  
Senyum sekilas tangan ditadah  
Sekalung penghargaan kami titipkan  
Skuad Waja Sabah memang hebat bah!

21. Akhir kalam, dengan kalimah suci “Bismillahir Rahmanir Rahim” saya merasmikan Program Semarak Skwad Waja Sabah 2022.

“AYUH KITA SERTAI SKUAD WAJA”

*Wabillahi taufiq walhidayah  
Wassalamualaikum warahmatullahi Wabarakatuh.*

**YB Dato' Hajah Siti Zailah Binti Mohd Yusoff  
Timbalan Menteri Pembangunan Wanita, Keluarga Dan Masyarakat**

**3 Jun 2022**